

UDHËZIM
Nr.3, datë 16.8.2010

**PËR RREGULLAT DHE PROCEDURAT E PAJISJES SË SHTETASVE TË HUAJ,
REZIDENTË DHE JOREZIDENTË, ME LEJE GJUETIE**

Në mbështetje të nenit 102 pika 4 të Kushtetutës dhe në zbatim të pikës 2 të nenit 42 të ligjit nr.10 253, datë 11.3.2010 “Për gjuetinë”,

UDHËZOJMË:

I. TË PËRGJITHSHME

1. Gjuetia nga shtetasit e huaj, rezidentë dhe jorezidentë, zhvillohet sipas dispozitave të ligjit nr.10 253, datë 11.3.2010 “Për gjuetinë” dhe akteve normative në zbatim të tij.

2. Shtetasit e huaj zhvillojnë veprimtarinë e gjuetisë brenda sezonit të miratuar, në ditët e caktuara për gjueti, në zonat e lejuara, për llojet e faunës së egër objekt gjuetie, si dhe brenda limiteve ditore për çdo gjuetar.

II. GJUETIA NGA SHTETASIT E HUAJ REZIDENTË

1. Shtetasit e huaj rezidentë në Shqipëri pajisen me leje gjuetie duke ndjekur të gjitha procedurat si për gjuetarët vendas.

2. Shtetasit e huaj rezidentë paraqiten pranë drejtorive të shërbimit pyjor (DSHP) përkatëse në mënyrë individuale duke paraqitur dokumentet e mëposhtme:

- a) Dokumentin e identitetit;
- b) Lejen e qëndrimit, të lëshuar nga Ministria e Brendshme;
- c) Autorizimin e mbajtjes dhe përdorimit të armës së gjahut, të lëshuar nga Policia e Shtetit.

III. GJUETIA NGA SHTETASIT E HUAJ JOREZIDENTË

1. Gjuetia nga shtetasit jorezidentë kryhet në mënyrë të organizuar nga subjekte, të cilat kanë zona gjuetie në përdorim dhe që kanë si objekt të veprimtarisë së tyre organizimin e gjuetisë turistike.

2. Të drejtën për të organizuar gjueti turistike e kanë edhe personat fizikë apo juridikë, dhe shoqatat e gjuetarëve që kanë sipërfaqe në përdorim për mbarështimin e faunës së egër dhe ushtrimin e gjuetisë, dhe zona të lejuara për gjueti.

3. Drejtoritë e shërbimit pyjor, pas përfundimit të procedurave të konkurrimit, para çdo sezoni, dërgojnë pranë Ministrisë së Mjedisit, Pyjeve dhe Administrimit të Ujërave listën e subjekteve dhe personave fizikë, juridikë apo shoqatave që kanë fituar të drejtën e përdorimit të zonave të gjuetisë apo të mbarështimit të faunës së egër objekt gjuetie.

4. Ministria e Mjedisit, Pyjeve dhe Administrimit të Ujërave, para fillimit të çdo sezoni gjuetie, dërgon pranë Ministrisë së Brendshme listën e subjekteve fituese që kanë të drejtë të ushtrojnë veprimtarinë e gjuetisë turistike (qarku, rrethi) për të kryer veprime të mëtijshme për pajisjen e shtetasve të huaj me autorizim për mbajtje arme gjahu dhe municioneve përkatëse për të hyrë në territorin e Republikës së Shqipërisë.

5. Gjatë sezonit të gjuetisë subjektet, personat fizikë e juridikë apo shoqatat që kanë fituar të drejtën e përdorimit të zonave të gjuetisë apo të mbarështimit të faunës së egër objekt gjuetie, për çdo hyrje të shtetasve të huaj me armë gjahu për gjueti turistike, në territorin e Republikës së Shqipërisë, me shpresë zyrtare dhe shtatë ditë para mbërritjes në pikën e kalimit kufitar (PKK) të këtyre shtetasve, i kërkon Drejtorisë së Përgjithshme të Policisë së Shtetit pajisjen me autorizim të përkohshëm, për mbajtje dhe përdorim arme gjahu, për një periudhë të caktuar kohe, me këto të dhëna:

- a) Emër dhe mbiemër;
- b) Numrin e dokumentit të identifikimit;
- c) Numrin, markën dhe kalibrin e armës;
- d) Sasinë e fishekëve, të cilët nuk mund të jenë më shumë se 50 copë;
- e) Datën, PKK, ku do të hyjë shtetasi i huaj në territorin e Republikës së Shqipërisë, datën, PKK

të daljes nga territori i Republikës së Shqipërisë.

6. Drejtoria e Përgjithshme e Policisë së Shtetit (Drejtoria e Rendit dhe Sigurisë Publike), pas shqyrtimit të kërkesës, lëshon autorizimet përkatëse dhe ia dërgon subjektit kërkesës dhe një kopje për dijeni Ministrisë së Mjedisit, Pyjeve dhe Administrimit të Ujërave.

7. Subjektet fizike, juridike apo shoqatat që kanë zona në përdorim dhe mbarështojnë faunën e egër, dorëzojnë në komisariatit e policisë të rrethit dhe DSHP-në përkatëse një kopje të autorizimit të përkohshëm për mbajtje dhe përdorim arme gjahu.

8. Në përfundim të ditës së gjetisë dhe të sezonit të gjetisë, subjektet dërgojnë informacionin pranë Drejtorisë së Shërbimit Pyjor mbi llojet dhe numrin e krerëve të gjuajtur.

IV. Për zbatimin e këtij udhëzimi ngarkohen drejtoritë e shërbimit pyjor, Drejtoria e Kontrollit për Mjedisin dhe Drejtoria e Biodiversitetit të Ministrisë së Mjedisit, Pyjeve dhe Administrimit të Ujërave, si dhe Drejtoria e Përgjithshme e Policisë së Shtetit (Drejtoria e Rendit dhe Sigurisë Publike) të Ministrisë së Brendshme.

Ky udhëzim hyn në fuqi pas botimit në Fletoren Zyrtare.

MINISTRI I MJEDISIT, PYJEVE
DHE ADMINISTRIMIT TË UJËRAVE
Fatmir Mediu

MINISTRI I BRENDSHËM
Lulzim Basha